

# Залгълдана кӧдлмшин дуту-дундс бар тархалгънд харшлна

Юстинск района совхозмудар, фермсӓр, онц хӧбнӓ хошмудар, ӧвс хадлгъна бригадмудар кесг олн кӧдлӓчнр, те-дн дунд кӧдлмшин диилвр бӓрдж йовх хӧбчнр, малчнр, тосхачнр бӓӓцхӓнӓ. Эдн кӧдлмшиннь хӧбн амрсн цагтан Хальмг тангъгчар, цуг мана ӧргн орн-нутгар ямаран сонън зӓнъг, ямаран хӧбч, укрч, кӧдлмшин шин дамшлт кӱцсинь ӧдр болгън меддж авхар седцхӓнӓ.

Болв Юстинск района залгълдана кӧдлмшт ик гидг дуту-дунд бӓӓсн учрар, эн олн кӧдлӓчнр цаг-цагтан авх зӧвтӓ газет-журналмудан авч чадлжаш. Эн районд залгълдана 8 отделень бӓӓнӓ. Почт зӧбдг машин эн залгълдана отделеньсӓр долан хонгин дунд хойр дакдж йовна. Элстӓс ирсн почт района залгълдана конторт йилгълтлӓн хойргурв хонна, теруӓнӓсн эн района совхозмудар бӓӓх залгълдана отделеньст кӱргдж ӧггдтлӓн 7-8 хонгдна. Улгӱрнь, май сарин нег шинӓ газетиг района центрӓс 90—100 дуунад бӓӓх „Эрдниевский“ совхозин залгълдана конторт майин 10-д авч ирв. Эн залгълдана конторас, совхозин фермсӓр авч одна гидг йир тӱрӱ.

Фермсӓр шишлнь бичг, газет, журналмуд зӧбдг кӱн уга болсӓр, тендӓс кӱн кезӓ ирхинь кӱлӓх, эс гидж тиигӓн оч бӓӓх кӱ хӓӓх кергтӓ болдж гарна. Фермӓс хӧбнӓ хошмудар авч одлгън бас ним бо-

лдж гарна. Тегӓд центрӓс хол бӓӓх „Эрдниевский“ совхозин 3-ч фермин, „Полынный“ совхозин 2-ч фермин кӧдлӓчнр, кеер хӧбнӓ хошмудар йовх хӧбчнр газет, журналмули 10-15 хонад авцхӓларн, икӓр байрлцхана.

Иим дуту-дундс „Никольский“ совхозин 3-ч фермд бӓӓх Белозерный, „Раздольный“ совхозин 3-ч фермд бӓӓх Раздольн залгълдана отделеньсӓр чигн бӓӓнӓ.

Юстинск района залгълдана конторин ахлач ӱр П. А. Павличенко эн тоот дуту-дундиг ӱзӓд, медӓд бӓӓсн бийнь, кергтӓн авчаш. Ӗлгӓ цагт джилин хойрдгч ӧрӓлӓс авн, централън, крайин, тангъгчин болн района газетс, журналмуд тархалгън болджана.

Джилин тӱрӱн ӧрӓлд газетс, журналмулт бичгдсн улсин кесгнь, хойрдгч ӧрӓлӓс авн газетс, журналмуд авдган уурн гиджӓнӓ. Тер улсиг джилин хойрдгч ӧрӓлд газетст болн журналмудт бичгдлгънӓ кӧдлмш цуг района залгълдана отделеньсӓр ик тату-гъар кегдджӓнӓ.

Деер келгдсн залгълдана конторин кӧдлмшиг шуудж хӓлӓгъӓд, ахр цагин эргид эн дуту-дундсиг уурулх тӧр-совхозмудин эклц парторганизацсин, КПСС-н Юстинск райкомин пропагандин болн агитацин отделин эрки тӧрнь.

ЭЛЬДАН Эрдни.